

**INATSIARTUT
OMBUDSMANDIATA
UKIUMOORTUMIK
NALUNAARUTAA
2002**

Tamanna pillugu paasissutissaq suliap suliarineqarnerani tunngaviutis-sallugu pissutissaqarsimanngilanga, tassami paasissutissaq taanna kommunip suliaataani allanneqarsimanngimmat.

Taamaattorli manna oqaatigissallugu pissutissaqarpunga, tassalu oqartussaasup suliniuteqarneratigut aamma oqarasuaatikkut saaffiginnissutit allattuisussaataitanermi pineqartunut ilaatinneqarsinnaasut.”

2. Suliami akileraartarnermut pisortap sulisorineqarneranut tunngasumi allagaatinik paasitinneqarsinnaatitaaneq.

Innuttaasup kommunimi akileraartarnermut pisortaq pillugu suliami allagaatinik paasitinneqarnissamik qinnuteqarnerminut atatillugu suliap sorliup allagaatitaanik paasisaqarfigerusunnerini erseqqissaqqullugu kommunimit qinnuigineqarsimanini naammagittaalliuutigaa.

Ombudsmandi isumaqarpoq suliami pineqartumi kommuni isornartorsiussallugu pissutissaqanngitsaq, taamaattorli isumaqarluni kommunimut ataatsimoortumik inassutigissallugu pissutissaqartoq suliani allagaatinik paasitinneqarnissamik qinnuteqarfigineqartuni kommuni imatut ilitersuisassasoq, taamaalillutik innuttaasut allagaatinik paasitinneqarnissamik qinnuteqartut suliap suuneranik erseqqinnerusumik suussusiliisinnaasaqqullugit. (J. nr. 11.10.20.08/083-02)

Suliap tunuliaqutarisai imaapput:

A-p naammagittaalliuutaa 27. august 2002-mi tiguara, tassanilu K Kommunimi ukiumi 2001-imi akileraartarnermi pisortaasoq pillugu suliami allagaatinik paasitinneqarnissamik A-p qinnuteqaataanik K Kommunip suliarinninnera naammagittaalliuutigineqarpoq.

A-p uannut naammagittaalliuutimini misissuineramik aallartitsinissamut pissutissaqalersitsumi makku oqaatigai:

”Aaatigut atsiortunga K Kommunimi ukiumi 2001-imi kommunip akileraartarnermik ingerlatsiviani pisortatut qullersaasoq pillugu allagaatinik paasitinneqarnissara allakkatigut 14. maj 2002-meersutigut qinnutigisimavara. Paasitinneqarnissamik qinnutigisami ilaatigut pineqartup aqqa atorfiatalu taaguutaa paaserusussimavakka. (...)

Allakkatigut 30. maj 2002-meersutigut kommunaldirektør D allappoq ”Kommunip qinnuigissavaatit atermik taasequsininni kina pinerit erseqqissaqqullugu. Suliami illua’ tungiuguit pineqartoq allakkanik atsiugaqarsimassaaq, tassanilu aqqa takusinnaassavat.

(...)” (Atorfeqarfimmi nutsigaavoq.)

Allakkatigut 23. september 2002-meersutigut K Kommuni qinnuigaara A-p naammagittaalliuuteqarneranut atatillugu oqaaseqaateqaqqullugu, tamatumaniilu kommuni aamma qinnuigalugu suliaq suna paasitinneqarnissa-

mik qinnutigineraa erseqqissaqqullugu A kommunip sooq qinnuigisimane-
raa akeqqullugu.

Kommunip allakkani 7. oktober 2002-meersuni imatut akivaanga:

”(...)

A qaammatini pingasuni K Kommunimi atorfeqartitaasimavoq. Taamaattumik K
Kommunip aqqissussaannermigut ilusaa A-p nalunngikkaa kommunip naatsorsuuti-
gisimavaa. Kommuni 2001-imi sisamanik ukuusunik ingerlatsiveqarsimavoq:

Aningaasaqarnermik ingerlatsivik, Isumaginninnermik Ingerlatsivik, Teknikkik-
kut Ingerlatsivik aamma Kultureqarnermik Atuartitsinermillu Ingerlatsivik. Tassan-
nga ersertutut kommuni akileraartarnermik ingerlatsiveqanngilaq.

(...)

Suliaq suna pillugu paasitinneqarnissamik qinnutigineranik A-mut erseqqissaq-
qusinermini kommunip pissutigisatuaa tassaavoq kommunimi akileraartarnermik
ingerlatsivimmi pisortatut qullersaasoq kina pineraa K Kommunip nalornissutigim-
magu, tassami kommuni akileraartarnermik ingerlatsiveqanngimmat. Isumaqarpu-
gut pineqartup atorfiata taaguutaa A-p erseqqissarsinnaasariaqaraa, tassami tassani
inuit sisamat pineqarsinnaammata, tassalu: Kommunaldirektøri, aningaasaqarner-
mut pisortaq, akileraaruserinermut akiliisitsiniartarnermullu pisortaq akileraaruseri-
nermillu nakkutilliisoq (skatteinspektøri), tassani suliaq suna pineqartoq apeqputaal-
luni. Oqaatigineqassaaq kingullit taaneqartut marluk pisortavittut inissisimannim-
mata, kiisalu suliami kommunaldirektørimut tunngasumi allagaatit A-mut paasis-
tissiissutigineqarsimallutik.” (Atorfeqarfimmi nutsigaavoq.)

Tamatuma kingorna imaattunik oqaaseqaateqarsimavunga:

*“K Kommunip allakkani 7. oktober 2002-meersuni uannut akissutaa tu-
saatissatut tiguara, tamannalu tunngavigalugu isumaqarlunga suliaq suna
pillugu paasitinneqarnissamik kissaateqarnermik A-mut kommunip erseq-
qissaqqusinera pissutigalugu kommuni isornartorsiussallugu tunngavis-
saqanngitsoq.*

*Taamaattorli suliani allagaatinik paasitinneqarnissamik qinnuteqarfiu-
suni K Kommunip allagaatinik paasitinneqarnissamik qinnuteqartut sulia-
mik sulianilluunniit allagaatinik paasitinneqarnissamik qinnutigineqartu-
nik pisariaqarnera naapertorlugu erseqqissaasinnaannortillugit ilitersu-
isarnissaanik inassuteqaateqarnissannut pissutissaqarpunga.*

*Ingerlatsinermi oqartussaasut ilitersuinissamut nalinginnaasumik pi-
sussaaffeqarnerat ingerlatsinermi ileqqorissaarnissamik piumasagaataa-
sut nalinginnaasut nassataraat. Tamanna Namminersornerullutik Oqartus-
sat Inatsisileriffiata suliaassat suliarineqartarnerat pillugit inatsit pillugu
ilitersuusuaani imm. 29-mi imatut oqaatigineqarpoq:*

*”Ingerlatsinermut oqartussaaffiit tamarmik suliaassani oqartussaaffigisaminni i-
ngerlanneqartuni innuttaasunut ilitersuinissamut nalinginnaasumik pisussaaffe-
qarput. Ilitersuinerit ingerlanneqartariaqarput innuttaasunut pitsaanerpaamik ki-
nguneqarsinnaasut atorlugit...*

*Ilitersuinerup qanoq iluseqarnissaanut qanorlu annertutiginissaanut aalaja-
ngiisuusaaq innuttaasut ataasiakkaat susasaqarfimmu pineqartumut tunngatil-*

lugu qanoq annertutigisumik pisariaqartitsinerat qanorlu annertutigisumik paasisi-masaqarnerat. Pissutsit malillugit aamma neqeroorutigineqarsinnaavoq suli an-nertunerusumik ilitsersuuteqarnissaq tamanna kissaatigineqarpat.”

Matuma kingorna naatsorsuutigaara kommunip allagaataanik paasitin-neqarnissamik qinnuteqarnernut atatillugu K Kommuni pisariaqartinne-qartut naapertorlugit ilitsersuisassasoq.

A qulaani taaneqartut pillugit allakkatigut allatigut ilisimatinneqar-poq.”

Matuma kingornagut kommuni nalunaaruteqarpoq kommunalbestyrel-sip 23. oktober 2002-mi ataatsimiinnermini oqaaseqaat tusaatissatut tigu-gaa.

3. Soraarsitsinissamik pilersaarutaasumi suliamik suliaqarneq.

K Kommunimit soraarsinneqarsimanini A-p Ombudsmandimut naammagittaalliuutigaa, matumunnga aamma soraarsitsinerup allakkatigut suliffimminut ingerlatinneqarsimasutigut taamaal-laar imminermi paasisutissiisutigineqarsimanera ilanngul-lugu.

Ombudsmandi isumaqarpoq K Kommuni A-p soraarsinneqarnis-saa pillugu aalajangiisimanngitsoq.

Kiisalu Ombudsmandi isumaqarpoq A-mik soraarsitsissamaar-nermut atatillugu K Kommunip suliamik suliaqarsimanera isor-nartorsiortariaqarluinnartuusoq.

Ombudsmandip K Kommuni qinnuigaa tamatuma K Kommuni sutigut qanoq-iliuuseqarnissamut pissutissaqalersinneraa ilisi-matitsissutigeqqullugu. (J. nr. 11.10.21.01/050-01)

A-p naammagittaalliuutaa 21. maj 2001-imi tiguara. A-p K Kommunimit soraarsitaasimanini naammagittaalliuutigaa, matumani sooq soraarsi-taasimani kiisalu allakkatigut suliffigisaminuinnaq ingerlatinneqarsimasu-tigut soraarsitaanini pillugu ilisimatinneqarsimanini ilanngullugit eqqar-saatigalugit.

Tulliuttuni suliaq misissuininni paasisannut tunngavilersuutinik ila-qartillugu allaaserineqarpoq:

A-p uannut naammagittaalliummini makku oqaatigai:

”Ataani atsiortunga Nunaqarfimmi Aqutsisut allaffianni asaasuuvunga soraarsi-taanissara tikillugu.

Siulermik soraarsitaaninnut suna peqqutaanersoq paasinngilara, uanga avaqu-tiinnarlunga iliuuseqartoqarmat. Allakkat K Kommunimeersut 9. maj 2001-mi ullu-lerneqarsiumasut kiisalu Nunaqarfimmi Aqutsisut soraarsitsinissamik innersuussu-taat tunngavilugit oqaloqatigineqarsimanngilanga tusarniaavigineqarnangalu suna pillugu ”uppernarsaasulimmik” allakkanik atuaasarsimanersunga. Uanga ukiut 18-it